

Permudah prosedur tingkatkan hasil padi bukan hanya salahkan pesawah

● Mekanisme baharu, pelan jaringan keselamatan sosial dan penstrukturan semula harga padi boleh kurangkan kebergantungan pesawah kepada kerajaan

● Cari jalan inovasi tarik minat golongan muda jadi generasi pelapis industri padi, wujudkan platform perluas jaringan petani, usahawan



Oleh Prof Madya Dr Ahmad Zubir Ibrahim
bhrencana@bh.com.my

Pensyarah Pusat Pengajian Kerajaan, Universiti Utara Malaysia (UUM)

Dakwaan mengaitkan kegagalan pesawah tidak mengikut prosedur operasi standard (SOP) penanaman padi sebagai punca utama pengurangan hasil menimbulkan pelbagai reaksi dalam kalangan masyarakat terutama pesawah.

Tidak dinafikan pesawah tergolong sebagai kumpulan rentan dan sentiasa terdedah kepada situasi mudah terancam. Rata-rata golongan ini bergantung kepada tanaman ini sebagai sumber pendapatan utama.

Pendapatan diperoleh secara bermusim turut memberi kesan kepada kesejahteraan hidup. Namun, pesawah tetap memberi komitmen dalam pengeluaran makanan negara.

Golongan ini sememangnya mempunyai tahap pendidikan rendah, tetapi kebanyakan pesawah ditemui sudah lama bergelumang dalam tanaman ini dan ada mencecah melebihi 20 tahun dalam industri ini.

Pengalaman lama dalam mengusahakan tanaman ini, memberi kelebihan kepada pesawah untuk menguruskan selok-belok tanaman ini. Petunjuk serangan penyakit padi dapat dikesan terlebih awal dan langkah pencegahan dapat dilakukan dengan lebih cepat dan berkesan.

Pesawah dapat mendiagnosis serangan penyakit padi dan merawat berdasarkan pengetahuan dimiliki melalui pengalaman dilalui tanpa menunggu agensi berkaitan. Pada masa sama, terdapat pesawah menggunakan platform media sosial untuk menyebarkan maklumat dan pemin-dahan ilmu berkaitan penanaman padi kepada masyarakat.

Turut berkongsi ilmu penggunaan baja dan racun serangga bersesuaian dalam memastikan pengeluaran makanan terjamin. Ia antara inisiatif yang perlu dipuji dalam menyebarkan pengetahuan kepada masyarakat khususnya dijadikan rujukan pesawah.

Pengurangan hasil pengeluaran padi tidak boleh diletakkan di atas bahu pesawah semata-mata, banyak faktor menyumbang kepada pengeluaran padi. Rangkaian sepanjang pengeluaran padi bermula daripada ketersediaan sistem pengaliran sempurna hingga penjualan hasil di pintu kilang menjadi penentu utama kepada pengeluaran hasil tanaman ini.

Kelewatan penghantaran dan pengagihan bekalan input mengikut jadual ditetapkan turut memberi kesan kepada pengeluaran padi dan membuka ruang kepada pesawah menanggung kos tinggi akibat terpaksa membeli input dengan harga tinggi di pasaran.

Kegagalan penanaman padi mengikut jadual di dalam musim sepatutnya turut mengubah kitaran tanaman padi dan mendedahkan tanaman ini kepada insiden di luar jangka. Tidak hairan kebanyakan petani padi tidak dapat mematuhi *rice check* sebagai panduan asas pengurusan tanaman padi sepenuhnya disebabkan kelewatan bekalan input.

Kos pengeluaran padi semakin meningkat

selari dengan kos sara hidup menyebabkan pesawah ketika ini tidak boleh bergantung kepada tanaman padi semata-mata sebagai pendapatan utama.

Ramai pesawah berpendapat pulangan industri ini kurang menguntungkan, namun pesawah tiada pilihan dan kemahiran, selain meneruskan usaha mengerjakan sawah sebagai rutin kehidupan.

Bagi petani berskala besar mungkin dapat, bertahan dalam industri ini tetapi bagaimana dengan petani berskala kecil, sudah pasti akan mendahului keperluan isi rumah terlebih dahulu berbanding keperluan tambahan tanaman padi.

Terdapat pesawah berskala kecil terpaksa melakukan kerja sampingan lain pada satu masa sama bagi menampung kelangsungan hidup. Situasi ini akan menyebabkan penumpuan kepada tanaman padi kurang diberi perhatian disebabkan kekangan masa.

Keadaan ini mengakibatkan segelintir petani padi berskala kecil berusia menjual tanah sawah kepada pihak ketiga untuk dibangunkan. Secara langsung mengakibatkan penyusutan tanah pengeluaran tanaman padi.

Kesan perubahan cuaca

Perubahan cuaca turut memberi kesan kepada rangkaian pengeluaran tanaman ini. Peningkatan suhu dan cuaca panas berterusan turut memberi impak besar kepada tanaman ini. Tanah sawah menjadi kering kontang sehingga sukar untuk jentuai melakukan penuaian memberi kesan kepada pengeluaran hasil.

Situasi ini sudah pasti menjejaskan hasil pengeluaran dan pendapatan pesawah untuk menampung keperluan asas dan harian. Tambahan pula beban hutang ditanggung menyebabkan pesawah melakukan pelbagai pekerjaan dalam satu masa.

Kesannya tanaman ini kurang diberi perhatian. Situasi ini memberi petanda tidak sihat yang akan mewujudkan pelbagai implikasi negatif kepada psikologi, sosial dan keselamatan pesawah.

Kekangan ini secara langsung akan mengakibatkan golongan terabit akan terus bergantung kepada kerajaan untuk tujuan kelangsungan hidup. Bagi jangka pendek, mungkin boleh dipertimbangkan bayaran pindahan bagi mengurangkan tekanan dihadapi petani berskala kecil.

Namun jangka panjang, satu mekanisme baharu dan pelan jaringan keselamatan

sosial perlu dilakukan bagi mengurangkan kebergantungan kepada kerajaan. Penstrukturan semula harga padi boleh dilakukan bagi membolehkan pesawah menarik nafas lega dan suntikan motivasi dalam meneruskan pekerjaan warisan ini.

Bagi pesawah berskala kecil, perasaan malu masih lagi menebal dalam kalangan mereka, kurang pengetahuan dan ada kala tidak tahu ke mana hendak dituju apabila berhadapan situasi luar jangka.

Raikan pandangan pesawah, kurangkan jurang antara agensi dan petani serta permudahkan SOP antara usaha perlu dilakukan untuk menghargai penat lelah pesawah bertungkus-lumus memastikan pengeluaran makanan negara terjamin.

Bagi memastikan industri tanaman padi berupaya menarik minat golongan muda sebagai generasi pelapis dalam industri ini, transformasi dan pembangunan modal insan generasi muda perlu diperkembangkan.

Usaha Lembaga Pertubuhan Peladang (LPP) sebagai contoh menganjurkan Simposium Peladang Muda Nasional 2024, sempena sambutan ulang tahun LPP ke-51 antara inisiatif terbaik mewujudkan suasana dan platform baharu serta kondusif dalam industri pertanian.

Melalui platform ini, sudah pasti dapat memberi ruang dan peluang kepada peladang muda untuk meluaskan jaringan kolaborasi antara usahawan di seluruh negara merentasi pelbagai sektor.

Pelbagai bentuk idea dan pendekatan baharu lebih komprehensif dan kondusif selari kehendak pemain industri dapat dijana bagi memartabatkan lagi sektor ini. Usaha ini perlu diteruskan secara berkala sama ada di peringkat Kementerian Pertanian dan Keterjaminan Makanan mahupun agensi di bawah kementerian berkenaan.

Pembangunan modal insan perlu digarapkan lagi bagi mempertingkatkan daya tahan pesawah dalam berhadapan situasi luar jangka. Sudah tiba masanya, penghargaan dan pengiktirafan kepada pesawah perlu diberikan bagi meletakkan peranan mereka di tempat sepatutnya sebaris dengan pekerjaan lain.

Sebagai wira tidak didendang, golongan ini tidak boleh dinafikan hak mereka atau dipersalahkan ekoran kemerosotan pengeluaran padi. Usaha mencari jalan penyelesaian harus menekankan situasi menang-menang, dan tidak menuding jari kepada mana-mana pihak.

